

EM2017/63

25/10-2017

Michael Rosing

Attaviitsoq

**Naalagaaffinngornissamut kissaatip, kiisalu Kalaallit Nunaata Savalimmiunit Danmarkimillu Naalagaaffeqatigiinnerata qanoq iliorluni pitsaasumik oqimaaqatigiinissaasa qularnaarnissaat pillugu apeqquteqaat allaavigalugu oqallinnissamik siunnersuut.**

(Inatsisartunut ilaasortaq Randi Vestergaard Evaldsen, Demokraatit)

Naalagaaffinngornissaq uanga kissaatiginngilara. Kisianni naalagaaffinngornissamut piviusunngortitsisussat paarlattuanik allassimareerput. Taamaattumik anguniagaq assigiinngikkaluortoq assigiimmik siunertaqarluta sulissuteqarpugut. Uanga nammineq kissaatigaara Kalaallit Nunaat tamatta inuulluarnissatsinnut periarfissiisoq, periarfissiisoq kulturitta pigiinnarnissaanut aamma periarfissiisoq nunarsuup sinnerani immitsinnut takutittarnissatsinnut nammineq erfalasarput atorlugu. Periarfissat taakku naalagaaffeqatigiinnerup iluani periarfissaareerput.

Kisianni nalunngisatsitut taamaattoqanngisaannarnissaanik oqartassanngilagut. Imaassinnaavoq nunarsuup sinnerata ukiuni 30-ni tulluuttuni ineriartornerata Kalaallit Nunaata naalagaaffinngornissaa periarfissaalersikkaa kissaatinngortillugulu. Kisianni qularaara. Ukiut untritillit kingulliit ingerlanerini kattussuunnerit ingerlapput. Europa naalagaaffeqatigiinngoriartorpoq Brexit pinnagu, kisianni upperaara qangatut naalagaaffittut inissisimaneq piffissap ingerlanerani arriitsumik taarserneqariartuaarumaartoq arlaannik annermik soorlu EU-tut ittumik. Kalaallit Nunaat siunissami sumut ingerlassanersoq naluara kisianni immikkut naalagaaffinngussagutta kiserliortupilussuanngussagunarpugut.

Qilersorsimasuunnginnissaq upperaara taamaattumik kissaatigaara inuit ataasiakkaat annerpaamik kiffaangissuseqassasut aalajangissallugu qanoq inoorusunnerlutik. Uannut tamanna pingaarnerpaavoq naalagaaffinngornerup nassataanik eqqarsaataannakkut kiffaangissuseqarnermut naleqqiullugu. Pissutaavoq upperinnginnakku uangut inuttut ataasiakkaatut kiffaangissuseqarnerulerumaartugut naalagaaffinngorutta.

Kisianni angorusuppara aningaasarsiornikkut imminut napatilernissarput, tassani meerartagut peroriartorsinnaalersillugit toqqissisimasumik sinaakkuteqarlutik angajoqqaallu pisariaqartitaminnik kiffartuunneqarlutik. Uangutsinnut tamanna angisuumik piumasaqarpoq, aallaqqaammullu ilinniarsimassuseq qaffassartariaqarparput. Tulliatut inuussutissarsiortut namminersortut aalaakkaasunik sinaakkuteqalertariaqarput ineriartorsinnaaqqullugit tamatsinnut pilersuisinnaanngorlutik. Tamanna angungutsigu taava oqalliseqqeriarta. Qularaara tamanikkornissaanut naalagaaffinngornissaq kissaatigiumaarlugu. Paarlattuanilli qaqugorsuarmut tamanna piviusunngorallarnaviangilaq taamaattumik eqqissillunga oqallinnissaq kinguaariit tulliinut tunniukkusuppara.

Qujanaq oqallinnermut nuannersumut.